

武備

二

明
衛

青海省地方史志
資料摘鈔集

弘治二年九月

北極村

K294.4
31

照鈔西寧府新志卷之二十

武備志

西寧府

明塞外四衛

安定衛 在西寧西北甘州西南漢為姑羌唐為吐蕃地元封

宗室卜烟帖木兒為寧王鎮之其地本名撒里畏兀兒廣袤

千里東近罕東北通沙州南接西番居民無城郭以氊帳為

廬舍產駝馬牛羊洪武三年遣使持詔招諭七年六月卜烟

帖木兒使其府尉麻答兒等來朝貢鎧甲刀劍諸物太祖喜

晏饗賚其使者遣官厚賚其王而分其地為阿端阿真若先

帖里四部各錫以印明年正月其王遣傅卜顏不花來貢上
元所授金銀字牌請置安定阿端二衛從之乃封卜烟帖木
兒為安定衛以其部人沙刺等為指揮九年命前廣東叅政
鄭九成等使其地賚王及其部人衣幣明年王為沙刺所弑
王子板咱失里復讐誅沙刺沙刺部將復殺王子部內大亂
番將多兒只巴叛走沙漠經安定大肆殺掠奪其印去其衆
益衰二十五年監玉西征徇阿真川土酋司徒哈答等懼逸
匿山谷不敢出及肅王之國甘州遣僧謁王乞授官以安部
衆王為奏請帝許之二十九年命行人陳誠至其地復立安
定衛其酋長哈孩虎都魯等五十八人悉授指揮千百戶等

官談還商長隨之人朝貢馬謝恩帝厚賚之復命中官齎銀幣往賜永樂元年遣官齎敕撫諭撒里諸部明年安定頭目多來朝擢千戶三郎等三人為指揮僉事餘授官有差并賜本衛指揮同知哈三等銀幣未幾指揮朵兒只來朝願納差發馬五百匹命河州衛指揮康受壽往受之壽言罕東必里諸衛納馬其直皆河州軍民運茶與之今安定遠運茶甚難乞給以布帛帝曰諸番市馬用茶已著為例今姑從所請後仍給茶於是定制上馬給布帛各二疋以下遞減三年哈三等遣使來貢奏舉頭目撒力加藏卜等為指揮等官且請歲納孳畜什一並從之四年徙駐苦兒丁之地初安定王

之被殺也其子撒兒只失加為其兄所殺部衆潰散子亦攀
丹流寓靈藏十一年五月率衆入獻朝自陳家難乞授職帝念
其祖先率歸附令襲封安定王賜印誥自是朝貢不絕二十
二年中官喬耒喜鄧誠使烏斯藏次畢力朮江黃羊川安定
指揮哈三孫散哥及曲先指揮散吉思等率衆邀故之殺朝
使盡奪駝馬幣貨物而去仁宗大怒勅都指揮李英偕康壽
等討之英等率西寧諸衛軍及隆奔國師賈失兒藍藏等十
二番族之衆深入追賊賊遠遁英等踰崑崙山西行數百
里抵雅令濶之地遇安定賊擊敗之斬首四百八十餘級生
禽七十餘人獲駝馬牛十四萬有奇曲先聞風遠竄追之

不及而還英以此封會寧伯壽等皆進秩大軍旣旋指
揮哈三等懼罪不敢還故地宣德元年帝遣官招諭之
復業者七百餘人帝並賜綵幣表裏以安其反側三年會
春賜安定及曲先衛指揮等官五十三人誥命初大軍之
討賊也安定指揮桑哥與罕東衛軍同奉調從征罕東違
令不至其所轄板納族瞰桑哥軍遠出盡掠其部內廬
帳畜產事聞降勅切責令速歸所掠違命則發兵進
討已進桑哥都指揮僉事正統元年遣官齎敕諭安定
王及桑哥曰我祖宗時爾等順天命尊朝廷輸誠効力
始終不替朝廷恩賚亦久而弗渝肆朕嗣位爾等復違

朝命約束部下良用爾嘉茲特遣官往諭朕意賜以幣帛宜益順天心篤忠誠保境睦鄰永享太平之福三年桑哥卒其子那南奔嗣職九年那南奔率眾掠曲先人畜朝廷遣官諭遠之不奉命反叔其行李帝怒勅責安定王追理王既奉命又陳疏詞乞憐帝乃宥之諭以保國睦鄰之義十年冬亦攀丹卒子領占幹些兒襲時王年幼叔父指揮同知撥思泰巴佐理國事其同儕儻多不相下王遣之入朝奏請量加一秩乃擢都指揮簽事歷景泰天順成化三朝頻入貢治洪三年領占幹些兒卒子子奔襲賜齋糧麻布諭祭其父先是哈密忠順王卒燕子廷議安定王與之同祖遣官擇一人為其後安定王不

許至是訪求陝巴於安定冊為忠順王命千奔追送家屬千
奔怒曰陝巴不應嗣王爵爵應歸綽爾加綽爾加者千奔弟
也且邀厚賞兵部言陝巴實忠順王之孫素為國人所服前
哈密無主遣使取應立者綽爾加自知力弱不肯往今事定
之後乃尔反覆所言不可從陝巴迄得立然千奔以立非己意
後哈密教被寇竟不應援十七年率眾侵沙州大掠而去正
德特蒙古大酋亦不剌河爾禿廝侵據西海盤掠鄰境安定
遂殘破部眾散亡僅存餘孽江纏尔加等僧俗四十有奇徒
居西寧沙棠川威遠城東歲輸馬二十有奇

阿菴衛 在撒里畏兀兒之地洪武八年置後為朵兒只巴殘破

其衛遂廢永樂四年冬酋長小薛忽魯扎等來朝貢方物請
復置衛設官從之即授小薛等為指揮僉事洪熙時曲先酋
散即思邀劫朝使脅阿端指揮鎖魯丹偕行已大軍出征鎖
魯丹懼率部衆遠竄失其印宣德初遣使招撫鎖魯丹猶不
敢誅依曲先雜處六年春西寧都督史昭言曲先衛真只罕
等本別一部因其父助散即思為逆竄處畢力木江其地當
烏斯藏孔道恐復為亂宜計之帝敕昭曰殘寇寤追無地自
容宜遣人宥其罪令復故業於是真只罕率所部還居帖兒
谷舊地明年正月入朝天子喜授指揮同知令掌衛事以指
揮簽事卜答兀副之真只罕因言阿端故城在回回境去帖

兒谷尚一月程朝貢艱乞移本土為便天子從其請仍給以印賜璽書撫慰之迄正統朝教入貢後不知所終其特西域地亦有名阿端者貢道徑哈密入與此為兩地云

曲先衛 在西寧西北肅州西南東接安定古西戎漢西羌唐吐蕃元設曲先答林元帥府洪武時酋長入貢命設曲先衛官其人為指揮後遭孛兒只己之亂部衆竄亡併入安定衛居河真之地永樂四年安定指揮哈三散即思三即等奏安定曲先本二衛後合為一比遭土番把禿侵擾不獲寧居乞仍分為二復先朝舊制從之即令三即為指揮使掌衛事散即思副之又從其請徙治藥王淮之地自是屢入貢洪熙時

散即思偕安定部酋叔殺朝使已大軍往討散即思率衆遠遁不敢還故土宣德初天子赦其罪遣都指揮陳通等往招撫復業者四萬二千餘帳乃遣指揮失刺罕等入朝謝罪貢駝馬待之如初尋擢散即思都指揮同知其僚屬悉進官給以詔命五年六月朝使自西域還言散即思率部衆邀叔往來貢使梗塞道途天子怒命都督史昭為大將率左右叅將趙安王彧及中官王安王瑾督西寧諸衛軍及安定罕東之衆往征之昭等兵至其地散即思先遁其党脫脫不花等迎敵諸將縱兵擊之殺傷甚衆生擒脫脫不花及男婦三百四十餘人獲駝馬牛羊三十四萬有自是西番震懾散即思素

狡悍天子宥其罪仍怙惡不悛至是人畜多損失乃悔懼明
年四月遣其弟副千戶堅都等四人負馬請罪復待之如初
令還居故地并隸其俸七年其指揮那那罕言往者安定之
兵從討曲先臣二女四弟及指揮桑哥等家屬被掠者五百
人今散即思已蒙赦宥而臣等親屬猶未遠望聖明垂憐天
子得奏惘然語大臣曰朕常以用兵為戒正恐濫及無辜彼
不自言由何知之即敕安定王亦攀丹等悉隸所掠其年散
即思卒命其子都力嗣職賜敕勉之十年擢那那罕都指揮
僉事其僚屬進職者八十九人正統七年遣使貢玉石成化
時土魯蕃強被其侵掠洪治中安定王子陝巴居曲先廷議

哈密無主迎為忠順王正德七年蒙古酋阿爾禿亦不剌
竄居青海曲先為所蹂躪部族竄徙其衛遠亡

松門楊氏曰按明初設安定阿端曲先罕東赤斤沙州諸衛給
之金牌令歲以馬易茶謂之差發沙州赤金隸肅州餘悉隸
西甯祿塞外四衛第查罕東衛在赤斤南漢效煌郡地也即
今之安西應入安西志寧郡不得攬而有也故不載時甘州
西南西甯西北盡皆番族受邊城巨羈絡惟北面防寇後諸
衛盡亡亦不剌等據青海土魯番復據哈密逼處關外諸衛
遷徙之衆環列肘腋獷悍難馴於是河西外防大寇內防
諸番兵事日亟矣哉

朝拓境直至伊吾凡此一帶羌戎悉有分地諸蕃皆內附諸戎皆守土莫不率俾內外又安可謂得制御之要道也

青海

青海即西海在湟中西海面有七百餘里為衆水會聚之所故海岸東西南北皆有水泉厥草豐美宜畜牧素號樂土漢武帝元狩六年先零與封養牢姐種解仇結盟與匈奴通合兵攻令居塞帝遣將軍李息郎中徐自為擊平之羌乃去湟中依西海鹽池左右始為羌所據平帝元始四年時王莽秉政諷羌獻西海之地置西海郡而築五縣徙天下犯禁者處之周海亭燧相望莽篡政紛亂郡亦廢棄和帝永元十四年

時西~~安~~海無復羌寇隄靡相曹鳳上言燒當諸種衰困遠依

發羌宜及此時建復西海郡從之嗣復為羌所據晉時呂光

徙西海郡人於諸郡尋徙樂都南北朝隸吐谷渾後魏孝文

帝太和四年拜吐谷渾伏連籌為西海郡公隋煬帝大業五

車國主覆建伊國為西海郡公

②年至西平陳兵講武命內史元壽等圍吐谷渾於袁覆川

伏允遠遁置西海河源等郡秋七月置馬牧於青海求龍種

唐太宗貞觀八年鄯州刺史李玄運表吐谷渾牧馬青海輕

兵輕掩之可盡致乃命段志元等擊之夢覺驅馬走止得牛

羊二萬而還九年以李靖為青海道行軍大總管率侯君集

等伐吐谷渾大破之高宗龍朔三年吐蕃攻吐谷渾詔鄭

仁泰救之乾封元年吐谷渾慕容賢為青海國王時吐蕃漸
強青為海其所有鄯州都督李叔元與吐蕃戰於青海敗績
永隆二年吐蕃贊婆屯青海河源道經畧大使黑齒常之襲
破之元宗時節度使王君奭王忠嗣等屢破吐蕃於青海後
五代以至宋元為唃廝羅等所據號為西蕃故有西蕃都護
之官焉明正德四年蒙古部酋亦不剌河爾禿廝擁眾西奔
瞰知青海饒富襲而據之破安定四衛番人多遠徙其畱者
反為所役屬自是西甯有海寇之患九年總制彭澤集諸道
軍將擣其巢寇訶知之由河州渡黃河奔四川出松潘茂州
境直走烏斯藏及大軍引還則仍返海上惟阿爾禿廝遁去

嘉靖尚書金獻民西征議遣官招撫許為藩臣如先朝設安定
曲先諸衛故事兵部行總制楊一清計度一清意在征討言寇
精騎不過二三千餘皆脅從番人然怨之入骨時款報讐可用
為間謀大舉勦絕未定王憲王瓚相繼未代皆以兵寡餉訕議
竟不行八年兆氓諸番數犯內地樞臣李承勳言番為寇所侵
日益內徙倘二寇交通何以善後昔趙克國不戰而服羌段頰
殺羌百萬而內地虛耗兩者相去遠矣乞廣先帝之明專克國
之任制置方畧悉聽瓚便宜從事瓚乃集眾議且勅且撫先遣
總兵官劉文游擊彭斌分布士馬明年月自固原進至岷岷
遣人開示福福兆氓各番族皆聽撫惟岷州東路若籠族兩

路板爾等十五族及岷州刺印等五族恃險不服乃分兵先攻
若龍板爾二族覆其巢即刺諸族震摺祈降凡斬首三百六十
餘級撫定七十餘族乃班師自是岷岷獲寧而西甯仍苦寇患
十一年甘肅巡撫趙載等言亦不剌據海上已二十餘年其党
卜尔漢孩獨傾心向化求帖木哥等屬番來納款宜因而撫之
或俾之納馬或令其遺質或授官給印建立衛所為哀誘雜於
計為便疏甫上會河套酋吉囊引衆西掠大破亦不剌營收其
部落大半而去惟卜兒孩一枝斂衆自保由是西甯亦獲休息
而納款之議竟寢及唐龍為總制寇南掠松潘龍憲其回巢與
諸番及他部勾通為患奏行甘肅守臣繕兵積粟為殄滅計及

龍去事亦不行二十年正月卜兒孩獻金牌良馬求款兵部言
寇果輸誠通貢誠西陲大利乃獻馬及金牌未有如往事歲
遣子入侍酋長入朝之請未可遽許宜令督撫臣偵察情實
並條制馭之策以聞報可會寇勢漸衰番人亦漸復業其議復
寢時北部俺答猖獗宣大諸鎮又羨青海富饒三十八年
携子賓兔丙兔等數萬衆襲據其地卜兒孩竄走遠縱掠諸番
至四十年以中濕腫足而跣苗賓兔據松山丙兔據青海西甯亦
被其患隆慶中俺答受封順義王脩貢惟謹二字亦斂戢時烏
思藏僧有稱活佛者諸部多奉其教丙兔乃以焚脩為名請建
寺青海及嘉峪外為久居計廷臣多言不可許禮官言彼

已採興工而令改建於他所勢所不能莫若因而許之以鼓其善心而杜其閔外之請况中國之禦戎惟在邊閔之有戎備之順逆亦不在一寺之遠近帝許之丙兔既得請又近脅番人使通道松潘以逆活佛四川守臣懼逼乞令俺答約束其子毋擾鄰境俺答言丙兔止因甘肅不許開市寧夏又道遠艱難雖有禁令不能盡制宣大總督方逢時亦言開市為便帝以責陝西督撫督撫不敢違意歷二年冬許丙兔市於甘肅賓兔市於莊浪歲一次既而寺成賜額仰華先是亦不刺之據青海邊城臣猶以外寇視之至是以俺答故竟視若屬番請首亦以父受王封尚不敢大為邊患自丙兔據青海有切盡台吉者河套吉能

從子俺答從孫也從之而西屢掠番人不得志邀俺答往而
俺答雅款侵瓦剌乃假迎活佛名擁衆西行疏請授丙兔都
督賜金印且開茶市部議不許但稍給以茶俺答既抵瓦剌
戰敗而還乃移書甘肅守臣乞假道赴烏思藏守臣不能拒
遂越甘肅而南會諸酋於海上番人益遭蹂躪多竄徙八年
春始以活佛言東還而切盡第火落赤及俺答庶兄子永邵
卜遂而居青海不去八月丙兔率衆掠番並內地人畜詔絕
其市賞俺答聞之駭書切責乃竟還所掠執獻為惡者六人
自罰牛羊七百帝嘉其父恭順賚之銀幣印以牛羊付賜
其部人為惡者付之自治仍許貢市俺答益感德而火落

赤侵掠番族不休守臣檄切盡台吉約束之亦引罪輸服及
俺答卒傳至孫拉力克勢輕不能治諸酋十六年九月瓦剌
他卜囊部衆有闖入西甯者副總兵李奎方被酒躍馬而前
部衆控鞍敵想奎拔刀斫之衆遂射奎死及千把總指揮入
負領兵官四十餘員全軍覆沒守臣不能討遣使詰責但獻
首惡還人畜而止以故無所憚愈肆侵盜時免丙及切盡台
吉亦皆死丙免子真相移駐葦剌川火落赤移駐控工川逼
近西甯日蠶食番族折而為寇用拉力克又西行助之十八
年六月入舊洮州副總兵李聯芳率三人禦之盡覆七月復
深入大掠河州臨洮渭源總兵官劉承嗣與游擊孟孝臣各

將一軍禦之皆敗績游擊李芳等死焉西陲大震事聞命尚
書鄭洛出經畧洛前督宣大軍撫順義王及忠順夫人有恩
使遠趣拉力克東踈而大布招番之令來者率善遇之自是
踈附者不絕大真二酋自知罪重又聞套酋卜失兔來助大
敗於水泉口拉力克復將遠柔抬懼徙帳去苗其党可卜兔
等於莽刺川明年總兵官尤繼先破走之洛更進兵青海焚
仰華寺逐其餘衆而遠番人復業者至八萬餘人西陲暫獲
休息已復聚於青海其種類有大落赤真相台吉納刺台吉
沙刺台吉哈壇把都兒南把兔兒台吉著力兔等與永邵卜瓦刺他卜
囊部落蟠聚雜處二十三年增設臨池總兵官以劉綎任之

未幾瓦剌他卜囊犯南川兵備副使劉敏寬參將達雲大破
之已連納刺諸酋犯西川巡撫田樂率敏寬達雲又擊破之
明年諸酋復掠番族將窺內地總部將周國柱禦之莽刺川
又大破之自是屢入鈔掠因兵備副使劉敏寬參將達雲同
知龍膺通判高第第文武協衷有智有勇恤兵籌餉不遺餘力
故不能大逞志崇正十六年冬李自成遣將陷甘州獨西寧
不下賊將辛恩忠攻破之遂進掠青海諸酋多降附而明室
亦亡

皇清定鼎燕京有厄魯特固始汗者青海沿邊直抵西藏皆為
所有聞

天威赫奕遂稽首誅命其餘喀爾喀 圖爾古忒 準噶爾灰
忒俱係流居青海共蒙古五種後支派漸分總名十八家其
白塔貴德郭密拉科及玉樹納克書遠近各番俱屬青海分
轄歲納添巴居雜諸羌密迤甘涼

聖祖仁皇帝每履於懷既 親統六師平定朔漠青海部落扎
什巴兔爾等震讻康熙四十一年因沛 殊恩命刺麻高南多
爾智招撫內附封固始汗子孫羅布藏丹津為親王其餘亦
授以貝勒貝子公台吉等職歲支俸銀赴京闕領印以刺麻
高南多爾智住寧撫寧理事情後部中二部保負外部馬爾
漢侍郎帝壽相繼辦理至雍正元年羅布藏丹津以青海蒙

古有拂其意者執自征伐侍郎常壽奉命解和而羅布藏

丹津違背是特郡王代青和碩氣見其鋒銳難禦奔赴河州

特命頭等侍衛達爾迎赴河州招撫其頁貝勒額爾得尼兒爾

克托克索貝子索諾木達什公噶爾旦達什奔甘赴州羅布藏

丹津與同黨阿拉克諾木齊 阿尔布坦温布 藏巴托布

等益肆猖狂是年九月

世宗憲皇帝命川陝總督年羹堯未寧以視形勢十月羅布藏

丹津迫脅各蒙古隘內外諸番侵犯南北西三川焚燬村堡是

時各族番人大寺喇嘛亦有蠢動者遂授羹堯為撫大將軍

徵調川陝官兵聲罪致討以是年十月師始出塞自冬涉春

屢破其衆凡回叛之部落戈鋌所指應時摧敗招降數十萬
衆又降其貝勒貝子公台吉等二十餘人 上猶憫其蠢愚
若悔禍思終束手未誅許其全宥乃怙惡不悛負險抗違故
始決翦滅之計以方畧 密付大將軍善光調度軍謀簡稽
將士用四川提督岳鍾琪為奮威將軍令頭等侍衛達鼐自河
至寧委以隨征兵部兼議政大臣率西寧總兵官黃喜林於
仲春初旬褫牙徂征分道深入搗其窟穴電掃風驅搜剔巖
阻賊徒蒼黃糜潰窮蹙失據直至哈瑪爾打坂漢羅布藏丹
津之母及逆謀渠魁丹津紅台吉等悉就俘執擒獲賊衆累
萬拉練三十三家台吉策令那木扎爾等所得牲畜軍械不

可數計賊首羅布藏丹津逃遁准噶爾地方我師逾陰窮追獲
其輜重人口殆盡自二月八日至二十有二日僅旬有五日本清西徵三
月之朔奏凱旋旅四月十有二日以倡逆之次拉克諾木齊等
三人獻俘 廟 社於是內外羌戎咸以手加額誠服我

世宗憲皇帝之神謀遠畧也又經美克條奏青海蒙古宜照
喀爾喀之例分其旗分編為佐領各管各屬定有分界而原
屬番人勿許管轄另行安插使奴不隸一去其羽翼因 命理

藩院侍郎鄂賚公同副都統達鼐於雍正三年出口振實窮
乏分編佐領查明清青海蒙古乃二十九家即分為二十九旗上毋
旗設協理台吉一員管旗軍宗副軍宗參領各一員按戶

口之多寡以百五十戶為一佐領共佐領一百二十四箇半每佐領設佐領一員裝騎校一員二十九旗扎薩克王貝勒貝子公台吉俱係世職頒授印信冊誥其協理台吉一職引見補授又經副都統達孛龍奏准各扎薩克憲書俸銀由京解寧支散俸銀在寧支領各扎薩克分為四班每年元旦朝覲週而復始併定以經理青海大臣每年出口會集各扎薩克會盟一次不得自相會集是年副都統達孛龍加銜散秩大臣歲終養廉銀一千五百兩辦理青海諸務雍正四年會同西寧總兵官周開捷安插西寧河施各番族每族委一百戶歸地方文武管轄田畝陞科雍正五年會同總兵官周開捷條議以沿邊各寺族喇

麻有名國師禪師者名目不合宜收前明各教印換給僧綱
都綱職銜議給衣單口糧其原管番族隸州縣管理原徵
香糧誅作正賦雍正六年准噶爾賊凌侵犯噶斯卡倫散秩
大臣達乃雅即於陰日出口統綜雅蒙古官兵進勦直抵噶斯
橋獲准噶爾遺賊益素克收其陣亡官兵骨殖而後進追旋
奉 命不必深入達即撤回嗣策烏木漢城西寧正西千二百餘
里駐兵遠斥堠雍正九年准噶爾侵犯西北西路軍營 命侍
部索佛保統兵萬人防範青海佛保以供支費繁奏用三
千人可以堵禦時青海扎薩克鎮國公拉格布扎薩克台吉格
罕阿布坦各帶部屬潛逃散秩大臣達蘇騎程追至木魯烏

素捐備糧餉詢集彼地番人招撫而插罕阿拉布坦之子拒捕被殺其拉插布插罕阿拉布坦就撫解部蒙

聖慈寬其罪愆追奪公誥降為庶人文伊叔親王代青和碩氣管束伊子降襲扎薩克台吉台吉插罕阿拉布坦在京病故

職族姪襲替散秩大臣達隆蒙

恩獎勵賞三千金是年六月扎薩克台吉諾爾布派佳騰蓋里卡倫自彼謀叛帶屬下蒙古槍劫滿兵馬匹殺傷馬廠滿兵及築城夫役青海扎薩克內亦有惑動者沿途各臺兵驚散亦有被傷者侍郎衆佛保馳至扎海蘇台安撫各蒙古整理台站文報始通諾爾布聞知散秩大臣達隆擒獲拉插布將

抵青海遂棄戈潛逃道經副都統格梅爾派兵擒獲送京訊明
解明寔正法遺職伊弟色特爾布木襲替

國家恩威並濟迨來恭順安靜每旗編佐領不等共設佐領一百
四個半每佐領一但設有壯丁一百五十名不計其戶口
共壯丁一萬五千六百七十五名其扎薩克王公台吉或遠
或近皆在青海之四面聯絡住牧如公巴且令 台吉達克
扎薩克刺麻吹達克三旗住牧青海之正東親王汪楚克

公負格 達什細木扎尔 台吉吉克吉扎布 汪楚克阿

里布坦 達尔吉 色特爾布木等七族旗俱住牧青海之

東南郡王策令阿拉布坦 額爾得厄厄尔克托克托蘇

貝勒達什且令 台吉小策令 達什敦多布 沙拉 額
爾德尼吉漢丹仲等七旗皆住青海之正南公丹蓋一旗住
牧青海之西南貝子索諾木達什 公策令納木扎爾 台
吉哈爾噶斯 策令多爾吉 巴爾雷 恭布等六旗皆住
牧青海之正西 郡王滾楚克達什 台吉達麻林色卜滕
二旗住牧青海之西北 貝子丹巴 公羅卜藏梅漢滾楚
克扎布三旗俱住牧青海之正北蓋漢時謂之西海唐時謂
之青海蒙古謂之苦苦諾兒此青海古今沿革我
朝措置之大畧也

校對記 六月九日

方輿紀要

西寧衛

洪武元年正月甘肅省理問所官初貢哥星吉歸附(此西祁始祖)

二年都督沐英畧地崑崙山番討番部平之

四年五月元西寧州同知李南哥以州歸附(此東祁二李始祖)

五年始立西寧衛

八年立安定阿端二衛

十九年四月命長興侯耿秉文城西寧

三十年罕東酋長鎮南吉刺斯入貢置罕東衛以瑣南吉刺斯為

指揮僉事又置西寧茶馬司招罕東等中衛等十三部納馬易茶

十年四月命征西將軍鄭愈副將軍沐英追吐番至崑崙山大破之

永樂四年置苑馬寺于碾伯城 置曲先衛

洪熙元年安定三叛命會寧伯李英西征至崑崙山擣霄澗平之

宣德八年改西寧衛為軍民指揮使司領左右中前後中左六千戶所

宏治五年遣指揮哈林詣西寧求安定王族孫陝巴襲哈密忠順王

正德四年北邊頭目阿爾瓦斯亦卜刺竄入西海攻破西寧諸番

先是北邊小王子怒哈爾瓦斯亦卜刺欲殺之二酋懼奔河套擁部落

至涼州乞空閒地居牧涼州將吏杜門不敢應凡十餘日始大掠入西海

攻破西寧^安定王等部奪其印誥諸番散亡遂據有其地 此西海住賊之始

七年閏五月海夷入犯北川守備江淮追至旱坪山擊敗之

七月指揮貢俊襲擊海夷於紅柳灘

八年正月海夷犯南川守備金冕禦之扁道嶺敗績指揮陳治死之
九年命總制都御史彭澤總徐謙西征海夷北邊亦卜剌復入西海先
是總兵徐謙帥萬人討夷西海夷聞南渡河大掠洮岷屬番未久復回
繼為小王子所收阿爾瓦斯亦卜剌二酋俱北徙未幾亦卜剌聞小王千復有
有殺害仍竄入西海

十一年正月海夷犯南守備種揖禦於扁道溝百戶葛鎮丁顯死之
已沙咎咂諸番部叛百戶佛元戰於水磨溝死之

總兵徐謙率兵襲已沙等叛番死之

十四年十月隆卜部烏思巴爾諸番酋叛千戶李淳戰死

十一月革咂部蕃瑣南溫右六失加侵掠宏化寺守備副使高顯守備

楊佑帥兵襲至擺羊戎山破之

嘉靖二年閏四月西海夷久犯北川守備楊佑擊於清水溝敗之

八年北邊阿爾瓦斯入西海與亦卜刺結姻

九年叛番叛碾伯指揮彭梁擊於土官溝敗之

十年海夷入犯西甯間居總兵官魚目經參將冶鸞敗之

十五年二月守備崔騏伏兵思巴務協襲擊海夷敗之

十六年二月守備崔騏敗海夷於鎖佛寺

二十年正月套夷入犯下川口都指揮祁鳳禦走之

吉囊犯西甯總兵楊信副總兵王輔等敗之

二十二年督哱部署酋却星吉出掠守備韓世盪討追敗之

俺答阿不孩來守備賊回犯涼州 十月世爵撲殺番酋

二十三年五月海夷犯南川守備薛卿禦之土狗爾峽北敵由西海歸套
二十九年爾加定部番攻掠碾伯守備唐勇擣集敗績

三十年咎咂部番攻掠紅崖堡百戶劉清總旂孫瑞光等死之

碾伯操守賀有年追擊叛番戰死 副使范瑟置定西門於水溝

南控扼叛番

三十一年守備鄭曉敗賊於燕麥川

三十二年汲和尚爾加定聚咎咂諸部攻掠堡砦兵備副使范瑟

率兵破之

三十三年署事叅將金鑒敗海夷於沙棠川

三十四年閏十月參將張廷輔擊叛番於沙棠川敗之

三十六年海賊犯南川大掠五月而還 六月操守彭汝為追擊于爾加定

諸部叛蕃死之 八月督哱部番出掠紅崖溝 十月叛番出

掠水磨溝復掠鍾家莊

三十七年五月叛番出掠白石溝 七紅帽兒番入掠瞿曇寺

十月督哱叛番入掠揚官溝 十二月督哱叛番入掠弩木只梅操守

嚴威學走之 叛番復掠西水磨溝

三十八年正月刺哱部番出掠土官兒溝操守楊真擊走之

參將張世俊擊叛番於乾溝敗之 二月刺哱部落復掠黑松

峽于家寨 九月海夷犯南川莊浪參將周欽合禦之 十月海賊

入犯西川參將張世俊令指揮羅松伏兵沙山尾擊敗之

四十年三月叛番掠顏只海操守嚴盛擊破之革咂占咂叛番雙

南山掠馬哈刺溝 參將崔騏禦海夷於擺羊戎山擊走之

隆慶二年思我思奇部番出掠兵備副使侯東萊督參將陳愷

掩擊獲其豪酋 千戶錢世英與紅帽兒賊戰死之

六年參將蕭文魁帥奇兵掩擊于爾却加部叛番斬其豪酋

萬歷九年哈咂部番入掠思打岔峽百戶劉承勛劉世畚討追出此石外

中伏死之

十三年兵備副使熊好爵帥兵搗哈咂部番破之

十四年套虜莊禿刺入掠碾伯等處諸番部

十五年八月松酋入掠燕麥川番部兵備僉事萬世德禦走之
松酋再犯北川萬世德禦走之

十六年九月海夷瓦刺他十囊入掠南川番部副總兵李魁等禦
於土狗兒硤死之覆其軍

十七年哈嘔部番入犯三川防守百戶劉存仁追戰死之

九月套賊十失兒入掠瞿曇寺等處

十八年正月哈嘔部番入掠沙棠川防守百戶劉世臣逆戰死之

五月順義王搶力銀送佛至西海因掠洮河二州 七月 詔遣兵部尚

書鄭洛經畧西海

十九年正月經畧尚書鄭洛檄副使石檟叅將劉德昭收諸生番部五萬

八千有奇 九月總兵張臣贊畫僉事萬世德叅將高光祖等出塞逐賊至西海焚仰華寺

二十三年戊寅九月海夷瓦刺他卜囊大寇南川兵備副使劉敏寬叅將連雲禦于裏茶朵峽殲之 十月辛酉海夷瓦刺他卜囊

聚納刺諸賊入寇西川都御史田榮副使劉敏寬叅將連雲遊擊

張應學金世威郭榮祖等合禦于康纏溝大破之壬戌都御史

田學監軍同知龍膺親督諸營兵追賊出塞至白石崖大破之

二十四年議城刺哈山通歸德路議立元朔城于朔山西 九月西寧

營哨騎同刺卜爾部蕃禦賊于西海之朋沙斬首十五級

海夷永瓦諸部蕃遁居鹽池腦大酋渡河而南以上見志

二十五年七月永召卜寇西川兵備副使劉敏寬叅將趙希雲禦
于勅牙壑兵敗希雲死之川北守備王汝翌中軍彭大禮死之
二十六年永召卜歸套大落赤牧西海請款許之 是夏海夷大
舉入寇副總兵李魁禦于灣溝歿死之

三十一年火落赤犯西川兵備李有實叅將張大紀破賊於巴爾革
三十四年城威遠川北平邊南川伏羌 是年谷述犯搶南川守
備李希梅死之

四十三年火落赤卒子黃台吉牧西海

四十七年黃台吉犯沙棠川兵備李作丹副總兵王汝金禦于
燕麥川却之

天啟七年黃台吉犯西寧兵備宋祖舜副總兵梁甫等禦却之
崇禎三年黃台吉兄弟殺乞節套賊土趙兒威頭目威鎮入據海兄
弟悉殺之許款

七年十月二十七日鎮海民馬安邦叛兵備孔間藉同妻女自焚死
太監張守禮守備丁孔允中軍李本隆百戶張爾靖等死之

時張太監因買馬激變 十一月掌教治秉乾西納班著爾額真平之

十年套酋瓦首大刺把都兒黃台吉等攻哈酋起免殺之收兵眾許款
十二年十月巡撫呂大魁剿巴咂加尔原番斬殺一千五百

十六年十二月偽防禦使齊之震副將軍魯文彬至西寧

十七年正月土官祁廷棟子興周執文彬殺之 偽總兵賀錦破西

寧興周復擊錦于南川伏羌殺之興周入西海

甘肅巡撫李若星天啟四年四月

疏請添設知府畧云

遼東甘肅設立衛所不設府縣以數百萬軍民付之武弁之魚肉顧
武弁希吮屯餘之膏血而播酷雪以開怨屯餘深恨武弁之陵轢面懷
反側以釀亂階在遼東則願歸酋不願歸中國而三韓已淪于腥
羶在甘肅則願歸海夷不願歸中國而甘涼幾莽為夷藪總因無
守令撫循其疾苦保護其妻孥遂置器然喪其樂生之心挺而走險
掉臂不顧然則知府一官可不亟議添設乎近仗皇威人心稍戢雖
有克免一戰金瘡殺死渠酋又有阿堪清羊水之戰少有擒獲然
海賊支派煩衍今古六三堡台吉多人擁兵據市每發夫入反或親近屢聚

沙崩偵探聲息狂逞復仇甘肅之危幾同累卵豈可優游坐眎不可為
之料理乎

嘉慶四年七月二十六日校對

甘肅新通志 卷首之三 二頁

嘉慶四年己未九月庚辰

上諭軍機大臣等昨據蘇甯阿奏阿郎杆賊番出搶孽生
馬匹四羣已降旨令台布馳赴西甯相機妥辦今據奏
該番賊等因兵丁追趕將搶去馬匹全行放回是賊性
尚知畏懼但恐素習詭詐難保其去而不來且雖將官
馬放還而搶馬正犯必須拏獲正法方足示懲現在蘇
甯阿已赴該處派兵緝捕扣番賊等尚敢抗違台布當
仍遵前旨酌派甘涼官兵親往督辦以助軍威其外委
劉全印以六十名兵深入番地全獲馬匹殊為奮勉著

遇缺拔補

校對
卷七
二二

38年七月二十六日
日核村

甘肅新通志 卷首之三 (八頁)

道光二年壬午六月己未

上諭內閣長齡等奏青海地方全就肅清移住蒙番防守
一摺循化貴德野番前此盤踞助勒蓋克克烏蘇一帶
原係蒙古貝勒特里巴勒珠爾等六旗遊牧地方現經
大兵將野番勦除淨盡該督等諭令該貝勒等各歸原
牧舍以移居青海已久人少勢孤不願復業該遊牧地
方寬闊若強令遷回勢不能固守藩籬著照所議助勒
蓋一帶即令察罕諾們汗移居克克烏蘇一帶飭回
阿里克大伯戶住牧均給予執照俾垂久遠每歲河水

結後責令分段防河並於冬春兩季賞給該諾們汗及
阿里克大百戶置備口糧銀各一千兩以示體恤現在
阿里克大百戶歡布他拉已故其子刺沁紉木札爾尚
未承襲係歡布他拉之弟乙達木代管其事乙達著賞
給六品頂戴及身而止俟刺沁紉木札爾襲賊後仍責
成佐理以資防守其向年會哨之兵即行停止至察罕
諾們汗失察屬下勾結野番屢次搶掠本有應得之咎
姑念此次隨營出力又將該旗賊犯查拏送究着加恩
免議 是日

上諭軍機大臣等長齡奏野番一千數百人復過河北搶

叔察罕諾們漢姓高並殺傷男婦十數人現已前往趕辦
據稱察罕諾們汗不能抵禦亟需另籌防河事宜等語青
海野番滋事前據長齡等報奏大加勅戮黃河以北全
就肅清並等議善後章程賞給察罕諾們汗等銀兩以資
防守彼時該督等所保人數過多朕因其辦理迅速概予
准行並未斥救一人其所議章程亦著准令照辦乃撤兵
甫經兩月該番賊復過河北搶掠可見前次辦理不善所
奏該處地方全就肅清之言竟不可信即此次具奏野番
一千數百人殺傷男婦十數人亦恐不止此數前因該蒙
占等不能固守藩籬該督以察罕諾們汗移居勅勒蓋一

帶足資防守每年賞給銀兩置備口糧其向年會哨之兵即
行停止今又稱察罕諾們汗不能抵瓦剌禦議防河是長齡
於此事毫無把握致前後所奏自相矛盾該督現已前赴
西甯著即會同松廷督兵妥速勅辦務期邊圉迅就肅清
俾賊番知所做懼不敢再出滋擾尚可稍贖前愆倘仍辨
埋不善致番賊於撤兵後又復前來肆行搶奪擾及內地
惟該督等是問恐不能當此重咎也

庚午

上諭軍機大臣等那彥成奏遵旨前赴西甯查辦番賊復
出肆掠一案據稱察罕諾們汗即係白佛僧亦即蒙古二

十五旗之一原牧在循化邊外後移居黃河之南今又潛往河北時與野番勾結為奸移之則驅而為賊西之則引賊作賊所論甚是那彥成於野番情形熟悉着交那彥成辦理必須籌畫萬全妥為安置勿使仍前窩賊分贓方稱至善其匿名揭帖字識務向各營汛訪拏正犯到案扣比對筆跡確有可憑雖該犯訐告得實亦按律治以應得之罪至所謂現屆九月西甯地方正值大雪封山之時未便議勅惟嚴飭各提鎮查明各卡隘山口額定兵數照例支給口糧柴薪派令副參等官帶兵赴各卡隘分紮駐守各提鎮來往會巡嚴密稽查使野番無由闖入內地並盤查

漢奸代為銷贓禁止商民私販茶葉大藥以防為勒等詔
該野番本係烏合之衆糾聚搶掠祇為謀食果能實力防
制使之無以為生日久漸形窮蹙正可不勒自潰着卽照
那彥成所奏辦理儘察看情形必須進勒俟明歲春融時
再厚積兵力痛加勦辦斷不可存畏難苟安之見惟青海
蒙古王公台吉等臣服已久迥非外夷可比若如那彥成
所奏僅將各沿邊卡倫移駐官兵防守竟置該蒙古等於
不問該野番等或於秋冬間乘隙往彼搶掠以致該蒙古
不能自存亦非安邊撫馭之道况青海一帶為通藏要路
去年卽有進貢堪布被劫之事如該野番等故智復萌道

路稍有梗阻殊屬不成事體那彥成亦不可不為籌及也
八月初九奉

上諭那清安等奏兵部當月司負付送新疆文移等項於
巴里坤黃布口袋內拆出匿名揭帖一紙並未粘封謹將
原帖呈覽一摺據揭帖內稱陝甘總督長齡等查辦青海
番賊一案甫經凱撤官兵旋有賊番復出約二千餘人分
作四股肆行劫掠該管大員並不派兵堵剿等語青海番
賊滋事前派令長齡齊慎前往查辦旋據奏稱帶兵剿除
黃河以北全就肅清並移駐富強蒙古番子以資防守等
議善後章程八條俱照所請飭行在案茲復有字識匿名

揭帖其所稱盜賊肆掠情形有滋擾月日及經過地方並
搶劫馬牛羊數目扣果屬實是長齡等前此奏報肅清盡
為虛捏殊出情理之外但揭帖內究係一面之詞亦難遽
信那彥成接奉諭旨着即馳驛前赴西甯嚴密確查據實
具奏此事關係邊疆重務不可稍有瞻徇隱飾况營馬搶
去三百餘匹之多必不能掩人耳目原揭帖一件發交那
彥成閱看並於該安營汛內查訪字識係何人造寫一經
訪有端倪即拿獲到案比對筆跡務得確實以憑根究至
陝西巡撫印務着交唐仲冕暫行護理其未經審結各案
交辛從益審辦盧坤現已補授廣西巡撫着即赴陝西署

理巡撫印務侯陳國仁到任後再行文却起程來京請再
前據長齡等奏勅蓋一帶即令察罕諾們汗移居克克
烏蘇一帶飭回阿里克大百戶住牧均各給予執照並於
冬春兩季賞給該諾們汗及阿里克大百戶置備口糧銀
各一千兩已降旨依議行矣朕近聞河北蒙古二十五旗
內該察罕諾們汗較為富強其時在游牧處所往往首鼠
兩端當大兵經臨之時即督率番族依附官弁及大兵撤
退之後仍復勾結野番乘間搶劫實屬不安本分那彥成
於青海情形較為熟悉着一併密行訪察該諾們汗旗下
現在有無勾結滋事之事查明設法妥為安置務令安居

游牧邊圉靖謐方為妥善將此諭令知之欽此

十月己酉

上諭軍機大臣等那彥成奏確查青海現在情形並酌安
卡隘嚴擊漢奸一摺據敘長齡勅辦野番屢獲勝仗所奏
尚非虛捏惟撤兵太早且察罕諾們罕實係野番中禍種
雉媒長齡反為捍護草率輕忽已明降諭旨將長齡撤去
雙眼花翎准帶單眼花翎仍交部議處矣野番冥頑成性
蒙古虐其屬下其屬下反投野番謀生因導引搶掠其主
至內地歇家奸販貪利潛往貿易魚事則教引野番漸擾
邊境有兵則潛與報信近年番勢漸張弊實在此蒙古回

民漢奸皆能為番子衣冠始僅勾結鄉導繼或冒名肆掠
款除外患自應先絕內奸其西甯之丹噶爾哈拉庫圖及
踈德循化巴燕戎格各屬回漢民人並熟番私販茶葉大
藥口糧潛往貿易者悉屬漢奸至各屬蒙古番子馭家擇
山僻處所私開小店銷變贓物亦所不免此等回民熟番
與內地奸民搶劫成風甚屬可慮那彥成所奏乃正本清
源之道然必須辦理周密計出萬全以期一勞永逸不可
稍有疏失其請分飭提鎮查明毘連番地卡隘通衢要路
酌增防兵多不過百名山僻小路增防兵二三十名其路
徑叢雜即挖新以防偷越野馬川一帶暫駐備兵數百負

名俱照所議行儻番賊仍前佔踞明歲春融卽厚集兵力
痛加驅勦至屯田一節俟河北肅清後再行妥議再奏

十一月丁丑

上諭軍機大臣等那彥成等奏擒獲搶掠撲卡之蒙古番
子審明正法並籌定各章程一節所辦均是此次賊番百
餘人撲番窩卜圖卡經那彥成督飭署游擊丁玉柱率領
官兵奮勇直前傷斃賊番十餘名生擒二名現據訊明正
法又守備爰隆阿因聞知賊番搶劫趕至黑河東岸槍傷
十餘名淹斃無數出力弁兵俱著該督等分別記名獎賞
鼓勵至甘涼肅州所屬邊地請撥兵分安各要隘其河南

循化貴德兩廳屬請派兵嚴密巡防又河州鎮屬二十四
關添設卡兵俱著照所請辦理惟沿邊移駐官係一時權
宜之計日久恐滋糜費務須於春融後剴捕甫清卽行裁
撤至西甯各城內向設官歇家容面蒙番近復於山僻小
路分開私歇家銷贖易糧私買軍火自應嚴行查禁嗣
後城關歇家無論官私一律造具花名清冊並循環印簿
由地方官詳報備查其各旗蒙古請票易糧每糧一石配
茶二封着於糧票內註明如買糧不買茶及無力糧茶並
買俱著由西甯辦事大臣衙門酌給印票填註數目如有
浮冒請領者查明治罪又河南安多生野番族易買糧茶

即着各寺喇嘛並各族曉事番子報明戶口計買均照蒙
古之票辦理就近在貴德循化廳營呈請如番族中有作
賊者即不准代請現在佔據河北野番俟隸河南方准請
票易買糧茶仍着該督等速籌章程趕緊辦理所有西甯
辦事大臣額設通事日久滋弊着即全行裁革遇有案件
由各衙門傳喚應差儘查有舞弊者即從嚴治罪至察罕
諾們汗窩賊分駐已久斷不可姑息容苗如能將屬下賊
犯按名擒獻遷回河南原牧尚可貸其重罪若稍涉抗違
明春即行勒辦所有長齡原請每年賣給察罕諾們汗及
阿里克銀二千兩之處即着停止其佔住河北野番亦多

作賊之人俟查有實在情形即行具奏又另片奏據署永

安營遊擊之都司周佐勝等俟定案時奏請鼓勵出力兵

丁酌予獎賞至此案區名揭帖人犯尚未得有確據着嚴

密查訪務得私拆口袋裝入揭帖之人查出端倪磨對筆

跡嚴行懲辦毋稍枉縱

十二月丁未

上諭軍機大臣等陝甘總督那彥成等奏察罕諾們汗率

屬悔罪願隸河南原牧現押令過河並妥為清理安插一

摺察罕諾們汗殺同野番勾結漢奸作賊已久此次經該

督將糧茶斷絕立見窮蹙願隸原牧不勞兵力不延歲月

易於反掌辦理認真實屬可嘉之至該諾們汗既已悔罪
投誠自可寬其一線其屬下頭目人等向不違約束自應
加以嚴懲經該督將同來之圖薩拉克齊小完冲等重責
鎖禁尔車並將該旗所管二十族分為左右兩翼照該旗
蒙古舊例每翼設員管束稽查擇誠實頭目另行補充其
諾們汗獻出之搶劫蒙古賊犯丹達勒等三名業經分別
懲辦並委署副將劉印景等押令渡河惟渡河以後必須
妥為安插俾統束嚴明互相鈐制令搶劫故智不敢復萌
方為經久善策不可將就歲事以致別滋事端又另摺奏
清理河南番族並河北賊番情形現在河南循貴賊番尚

知安分自應趁其畏懼之時立法約束該督現傳到各番
衆面加曉諭如各族內有逃至河北勾結賊番者卽着擒
獻毋許隱匿其河北野番過河以後查係伊等族內之人
自行管束扣係漢奸立即捆獻所有各番族頭目准其按
計戶口百戶一人每管百戶至三百戶踈一千戶管理百
總一人每管五十戶兩百總踈一百戶管理十總一人每
管十戶至五十戶踈一百總管理令其公舉誠實公直之
人充補其千戶等着照例給予頂戴俟三年無過發給印
照號紙作為實缺至易換糧茶章程每年准買兩次由千
戶給呈該廳營給予照票如實係良番方准發銷照買所

需布線等亦項於案內註明一同換買此時河北野番勢
成孤立該督仍嚴查卡溢糧茶趲籌肅清至河北番族應
趁其過河之時查明安插均着照河南之例辦理俾不致
疑懼該督仍察看情形再行妥議具奏又另摺奏審擬漢
奸盤據務盡根株並籌定巡防會哨及稽查山內保甲章
程首犯麻木濟經該督等嚴訊多在甘州之邊境野馬川
一帶結黨盤踞其中之野牛溝八寶山等處產有金砂
奸民潛行偷挖現據該督全行封禁窩洞窩鋪概予填
塞拆毀所辦甚是其所請提鎮副叅帶兵會哨道府州縣
編查保甲俱着照所議行至麻木濟等犯着暫緩正法俟

續拿餘黨逐案偵審再行辦理又另片奏漢奸私歇例無明文着照所請嗣後西甯地方拿獲私歇家除審有不法重情實犯死罪外其但在山僻小路經年累月開設私歇家者將為首之犯照私通土苗例擬處邊遠充軍為從之犯擬杖一百徒三年所有現獲各犯即照此例嚴辦

戊辰

上諭內閣那彥成奏玉舒番族每歲馬貢折銀請循舊例交納一摺青海大臣衙門所管玉舒番族向有馬貢折銀由該番目自赴西甯交納嗣於乾隆三十一年改派主事通丁前往催收各番族供應較繁殊滋擾擾累那彥成等

請循照舊例辦理用示體恤着照所請嗣後此項貢馬折
銀着仍循舊例責令該總管千百戶等照數奏齊於每歲
九月間交該處貿易番目自赴西甯交納仍着青海大臣
會同西甯鎮派員完收貯庫所有主事通丁催徵之例永
行停止至該主事通丁催徵之例永行停止至該主事通丁前
往會盟之年如有自備土儀致送番族及客商私帶貨物
一併查明究辦以除積弊

三年癸未正月癸酉

上諭軍機大臣等那彥成等奏河北野番及察罕諾們汗
全數回巢並酌移河南四旗蒙古各一摺青海黃河以北

屢經番族佔據察罕諾們汗一旗復勾結漢奸夥同搶掠
經那彥成等設卡防堵斬絕糧茶並訪獲漢奸巨盜及偷
挖金砂各犯分別懲治現據察罕諾們汗稽顙乞命所屬
蒙番全數押回河南貴德原牧各族野番勢已窮蹙自可
寬其一線惟河北不可復而野番一人借使借漢奸蒙古無可
假借方為正本清源之道所有偷住河北之貴德循化各
番族共一萬七八千人現已全數回巢着該督等派委幹
員即將河南各族野番逐一編查設立千戶百戶等分別
管轄仍各按戶口與蒙古一律易買糧茶由各族千戶就
近代為請票扣有為匪不法及偷渡河北之人即不准請

票易糧豆着於野番南渡時查明本係何族即交該族千
百戶遞管安插各要渡口分派把守僅有一人私渡即將
該千百戶一律治罪該番族經此次懲創之後管束既嚴
門戶亦別其勢愈分其力愈弱自厲一勞永逸之計其請
將該番族比照玉舒番子之例立定貢馬章程於約束之
中仍寓羈縻之意著妥議章程具奏至另摺奏河南四旗
蒙古札薩克郡王達什仲鼐等較河北各旗稍為富強因
屢被野番賀爾族侵掠不遑安居請遷居河北助勒蓋一
帶酌給口食並派循貴營員沿途互送等語該四旗蒙古
游牧河南已久此時若令移居河北是先示賤番以弱如

移住後該蒙古不能自固藩籬或悉賊復行渡河搶掠仍
恐不能相安此事務當籌畫萬全不可輕議更張致將來
又滋流弊其河北原住二十四旗蒙古除台吉恩開巴雅
爾一旗尚堪自衛外餘二十三旗札薩克大半避入內地
並散處邊內插帳住牧及沿途乞食者自應妥為安置所
有各旗蒙散失戶口著該督即飭令各府州縣於編查邊
內居民保甲時查明該蒙古姓名旗分分起押交各該旗
王公台吉領回收住其實係窮苦無依者如捐贖口食銀
兩尚有不足即著奏明酌發贖需以資接濟該督等務須
妥為經理○使內地不得存留蒙古亦不使蒙古界內私

藏漢奸倖各安生業永靜邊陲方不負委任

三月壬寅

上諭軍機大臣等那彥成等奏據循貴文武各委員將回
東之察罕諾們汗屬下及野番各族逐細編查已查出歷
年搶竊官馬贓物及熟番婦女現將渡口交各番頭目看
守並遵旨將河南四旗蒙古仍舊原牧等語回東各番散
處河濱款其不渡河北全在地方文武負弁實力稽查周
詳妥善俾野番自當懾服乃可歷久相安那彥成等此次
督飭查辦河北實已肅清其叩頭悔罪看守渡口之番目
等承充戶總並未賞給頂戴亦未另給賞號俟一二年後

如果野番絕跡再行奏請賞給頂戴並著嗣後責成西甯旗道於春秋二季輪往循賞點驗門牌戶口如有一戶逃之即向該管戶總嚴追下落儘係潛渡河北詢明住所飛報西甯大臣總督衙門立往擒拿嚴切究辦編查番族為邊疆要務那彥成等務當按照奏定章程飭屬奉行勿怠不可日久視為具文以致番族覬覦復行偷渡也

庚午

上諭軍機大臣等那彥成等奏請定商民與蒙古貿易章程並封閉邊外金廠西甯涼州等處向來商民攜帶貨物由西甯辦事大臣衙門給票出口徑赴蒙古游牧貿易既

不能指定地方去來亦無期限以致漢奸混雜互夾帝達
禁器物於邊陲大有闕繫惟念蒙古以遊牧為業若將羊
客禁絕誠恐生計日艱扣漫無稽查又復諸弊叢生該督
等請嚴立章程明定地界自應扣此覈實辦理嗣後無論
何州縣羊客與河北蒙古及河南蒙古番子交易即以現
在_處地界為限不許輕赴蒙番遊牧處所收買至甘涼肅州
羊客准由野馬川沿邊一帶行走先行報明西甯辦事大
臣衙門分別發給大票小票逐一註明嚴定期限由西甯
府知會各提鎮飭知守卡弁兵據實查驗毋許浮冒其蒙
古羊隻每年定以四月至九月按照指定處所售賣事竣

不准逗遛以杜弊端至河南番族出售羊隻並飭循貴兩
廳於貿易時照給票之例辦理此外甘州之野牛濟南州
之赤金湖等處向有漢奸偷挖金砂現經該督等嚴拏查
禁推大通縣屬之札馬圖官金廠該匪徒等難保不乘間
潛往開採着即嚴行封禁所有應納正撤課金二十八兩
零即停其交納此項人夫糾聚已久該督等務須妥為安
插無致流而為匪倘經理不善仍有匪徒濶跡偷挖致生
事端惟該督等是問

辛巳

上諭內閣那彥成等奏請賞給野番各族千戶百戶百總

並防河家番青棵一摺猶化貴德野番向係分族而居本
無統束故易於偷渡河北散漫無稽現據那彥成等編查
戶口分立千戶百戶百總令其遞相管轄稽查各族番子
易買糧茶由該千百戶等代為請票遇有為匪不法者
責令擒獻究辦茲該督等奏綜野番之千百戶等現在均
知管束番眾復獻貞馬察其情詞怍怨洵為懾服諫誠自
當量予恩施所有該番目等果能始終不懈着每年千戶
一名賞給青棵十二石百戶一名賞給青棵八石百總
一名賞給青棵四石至猶貴黃河渡口二十處責令察罕
諾伯汗旗下圖薩拉克齊等及野番千百戶等把守亦當

分別賞罰以示勸懲其竅姦要渡口如果一年無偷渡之人賞給青稞二十石次要渡口賞給青稞十五石又次要渡口賞給青稞十石僅防守疏懈致有偷渡又匿不舉報者查出由何渡口偷渡即將把守之圖薩拉克齊及千百戶等斥革嚴辦該野番千百戶及防河圖薩拉克齊等經此次特加優賚生計有資當知感知畏認真效力方得長邀恩賞也懍之

五月乙未

上諭內閣那彥成奏酌支西甯防兵行裝分例一摺西甯口外新設換防官兵前經該督奏明按年更換除沿途

應需鹽菜車輛等項並官員借支俸銀均照新疆換防舊例辦理外所有兵丁行裝一項該處氣候較寒向無兵防棲止每兵一名着准其暫給銀五兩俾禦寒有資以示體恤俟兵房修建完竣後仍照舊支銀三兩計入新疆防兵案內一併報銷

七月癸未

上諭內閣那彥成奏換下防兵丁中途水淹衝失軍裝銀兩分別辦理一摺甘肅甯夏鎮各營派往烏什阿克蘇換防官兵行至中衛縣屬地方猝遇暴雨山水陡發淹斃兵丁趙連登李得勝王得喜車夫徐自信石萬倉五名

又衝失軍裝色十七回帶解防所及車價銀九百四兩零
據該督查明經該縣將被水兵丁按名捐給口糧並墊給
行裝車價銀兩尅期前進加恩着照所請此項墊發銀兩
軍裝准其在藩庫動款補製遠墊毋庸於該兵丁等月餉
內扣繳賠補其淹斃兵丁等五名着每名賞銀五兩以示

諭部

十月庚子陝甘總督那彥成奏蒙番回衆均極安謐
並將公呈譯奏

上諭曰蒙番回衆果能長此畏威懷德邊徼無事則是長
發同卿莫大之功也嗣後仍當隨時留意相機料理以期

永靖邊陲慎勉而行

十月癸亥

上諭內閣那彥成奏酌增青海酬賚銀兩一摺西甯辦事大臣衙門額設酬賚銀一千兩現據該督查明每年辦理蒙古番子事務及巡查兵役並緝拏賊匪均須厚賚鼓勵需費較倍於昔額設之項實屬不敷該管大臣因措辦維艱支用養廉殊非經久之道自應量為增益俾資辦公着照所請於司庫存貯各屬舊草皮價款內提出銀二萬兩發交西甯府就近發商生息按年一分可得息銀二千兩以一千兩解交司庫統限二十年踈還原款以一千兩

解文西甯道支供青海酬贖之需仍由青海衙門踈於酬
贖案内造冊咨部覈銷

十一月庚寅

上諭內閣那彥成等奏酌派總兵巡哨番地並派兵防河

一摺河北蒙古遊牧地方水草茂盛現值冰樵凍結之時

野番尤易偷渡雖設有防河千百戶等仍須官兵巡緝據該

督等奏除照上年防河章程派撥西甯河州二鎮屬兵丁

四百名選派將弁數員分佈河干防範外並酌派西甯河

州二鎮各帶弁兵百名親赴番地抽查保甲遊巡渡口至

冰樵融化後再行撤回辦理甚屬周密着該督等嚴飭該

鎮認真會哨隨時稽查毋任該千戶等稍有疏懈以杜奸
萌而靖偷渡不可有名無實日久視為具文也

校對記 七二六

